



Cu banderín di Aruba y Hulanda den man

Pueblo di Aruba a ricibi Pareha Real yen di entusiasmo

FOR di e brug pabou di Bestuurskantoor te na oficina di Gobernador tabata completamente yen cu hoben y adulto cu a duna acto di presencia na

e ceremonia pa yama Rey Willem-Alexander y Reina Máxima un caluroso bon bini na Aruba.

Gobernador Fredi Refunjol y

Comision Bishita Real 2013 ta contento con e mainta publico aki a bay, no solamente pa loke ta e partinan protocolar pero tambe e entusiasmo cu tabata reina bou di e publico. "Nos ta aki for di 8'or di mainta pa nos a haya un bon luga," un hoben di 8 aña a bisa, pega na e heki pa e no perde su luga.

"Ta increibel. Nunca mi a mira un Rey of Reina asina di cerca," un turista di crucero a comenta despues cu e Pareha Real a pasa dilanti e publico na nan yegada. Net algo prome di 10'or di diaranson mainta e delegacion Real a yega escolta pa polis motorisa. Pareha Real cu sonrisa riba su cara a saluda e pueblo cu a acudi e mainta aki.

E publico cu a presenta ta un variacion di muchanan di scol, Hulandesnan residencia na Aruba, localnan y tambe turistanan, tur hende entusiasmo pa por a saca un foto of saluda e Pareha.

Su Mahestad Rey Willem-Alexander a inspecciona Guardia di Honor pa despues uni su mes na e delegacion. E tabata un mainta hopi agradabel ya cu cada tanto distancia, tabatin un entretenimento local pa nan, manera Coro Nacional, grupo di baile di Club di Movimiento y Etty Toppenberg cu su Trio Huasteca. E trio a toca, na momento cu Pareha Real a pasa dilanti nan pa bay oficina di Gobernador, un medley cu entre otro 'Eres tu' y "Amigos para Siempre" cu a trece un legria cerca Reina Maxima, kende sin duda conoce e cancionnan aki.

E publico a keda warda te ora cu e Pareha Real a bolbe for di Gobernador, bishita na Parlamento y bishita na Cocolishi na Consejo di Minister, pa despedi di e mainta aki, cu grito di "Koning, Koning", cu a pone un sonrisa grandi riba cara di Rey Willem-Alexander.